



東華續錄

光緒七十三

臣朱壽朋敬編

臣章圭瑑恭校

冬十月丙寅朔雪○諭李鴻章奏故員虧短各款請查抄備抵等語直隸已故知縣馮瑋前在香港縣任內虧短正雜各款業經革職勒追並於東安平谷房山順義懷柔薊州各州縣任內虧短銀兩爲數甚鉅亦經咨籍著追均未完繳殊屬玩延著李鴻章畢道遠沈秉成飭查該故員歷過任所寓所有無資財寄頓分別查封訊追並著孫鳳翔飭屬將該故員原籍家產迅速查抄備抵以重庫款該部知道○子貴州平遠縣節婦錢丁氏旌表○丁卯欽奉 慈禧端佑康頤昭豫莊誠皇太后懿旨醇親王奏大員報捐銀兩懇請獎勵一摺正藍旗蒙古都統長善捐備購辦機器銀四千兩洵屬急公長善著賞戴花翎該部知道○諭軍機大臣等中越勘界事宜前經諭令周德潤鄧承修會同各該督撫詳細勘定此事關係重大必應慎之於始各處所繪地圖詳略不一法使所攜難保不互有異同目前分界自應以會典及通志所載圖說爲主仍須履勘地勢詳加斟酌若於兩界之間留出隙地若干里作爲甌脫最爲相宜○諭京師溝渠河道年久失修近多淤塞應如何分年籌款陸續修濬之處著該管大臣詳細履勘查明具奏○己

已命編修李培元高廣恩在上書房行走編修吳樹梅在南書房行走○庚午錫綸奏奴才前經飭派統領綏靖營記名提督署塔城總理屯防副將劉文和赴 欽差大臣甘肅新疆巡撫劉錦棠行營迎提光緒十一年分新餉該署副將臨行時面稟以塔城人民稀少每於勇丁革故出缺募補甚難擬自籌款項歸途招募餘丁帶領回營以備出缺時補額等語奴才當查該副將既係自行籌款且事屬因公姑允所請去後嗣據該副將稟稱在途患病將由哈密糧臺兩次領銀五萬餘兩先後交委員雷玉等管解回營該副將在瑪納斯調治病體忽於本年六月十一日據前隨該副將出差之外委李生福回營面稟於十二日接據該副將劉文和由驛稟稱歸途在瑪納斯等處新募補額餘丁二百餘名六月初七日至西湖以北斯臺地方劉文和因病未痊在彼暫歇不料是夜三更時有游匪從外嚷擾隨傳齊隊伍但新募餘丁尙無器械以致倉猝被匪衝散該匪引新募人丁數十名結隊向車牌子竄逸探聞此匪係李皮帽黨與仍回伊犁大西溝入夥各等語據此奴才卽飛檄南路防軍並添派選鋒營營總佐領額哲善署守備艾漢章等率所部馬隊越境剿捕一面飛速分咨 欽差大臣甘肅新疆巡撫劉錦棠伊犁將軍金順分飭各軍一體防剿以杜紛竄旋據南路偵探報稱前股游匪數十人由車牌子渡河恐兵追剿將渡船沉溺後向西遁逸餘與前稟相同奴才卽札調該署副將劉文和回營查訊據稱各情與各路探報大致

相符奴才伏查斯臺車牌子小草湖以西有葦湖百餘里樹木叢雜自伊犁潰勇滋事後時有游匪在彼潛匿乘間肆出搶掠西湖雖有防軍未能搜捕淨盡塔城商民視該處爲畏途該署副將雖係招募補額餘丁與募勇辦法有間然際此伊犁潰勇游匪滋擾之時所帶烏合原非舊部並不預籌器械以備不虞以致昏夜遇賊陡然衝散實屬辦事草率本屬咎有應得惟查奴才於光緒四年到任時塔城兵力太單時有回氛竄擾是年秋將劉文和所部馬勇調到巡防探剿地方賴以稍平比以缺餉萬艱劉文和撫恤衆勇設法籌食乃能顧全局而嗣經奴才增募兵勇亦頗資劉文和協同整頓塔城境內始得安謐而上年劉文和督率各營試辦開屯收糧亦有成效數年辛勤歷著似未便以一朝獲咎遽事捐棄前勞況邊地求材亦不易得請 旨將副將劉文和卽行革職仍留軍營効力以示懲儆用策將來得 旨如所請行○辛未命江西布政使劉瑞芬開缺以三品京堂候補並賞給二品頂戴○以張端卿爲江西布政使阿克達春爲安徽按察使○壬申賞給江蘇舉人汪士鐸國子監助教銜監生高延第翰林院待詔銜○癸酉福建臺灣巡撫劉銘傳因病乞休不允命賞假兩月○乙亥 慈福端佑康頤昭豫莊誠皇太后萬壽聖節 上詣 慈寧宮行禮祭 太廟後殿遣載敦恭代行禮○丙子諭軍機大臣等據總理各國事務衙門呈遞許景澄信函所陳寬留甌脫以杜後來爭衅等語與前次諭飭辦法正相脗合目前與法使

會議分界事宜必應博採衆說以資辯論岑毓英前奏擬請開導法使令其退還北圻數省於河內海陽地方通商等語周德潤鄧承修等與法使晤談時不妨姑持此論以爲抵制總之分界一事有關大局周德潤務當詳度地勢設法辯難多爭一分卽多得一分之利益切勿輕率從事○丁丑諭前年據御史馮應壽奏庫倫辦事大臣桂祥辦事乖謬藉端勒捐等情當派紹祺馳往確查茲據查明具奏此案桂祥被參上年令甲首捐銀七八千兩查無其事其所提商戶罰款係爲發放各員口分薪水等項之用尙無朦蔽惟派令差官書都那瑪等赴後地勸捐磚茶因商民欠交捐款責打押追該大臣信用劣員任令追逼勒捐毫無覺察且捐款已有成數並未具奏種種辦理不善殊難辭咎桂祥著交部嚴加議處卓索圖盟四等塔布囊書都那瑪卽武忠額既無職任又非調赴庫倫差委人員膽敢擅作威福任意妄爲荒謬已極著從重發往黑龍江充當苦差筆帖式綸錫於書都那瑪責押商民時但知附和並不攔阻實屬庸劣不職著卽行革職蒙古辦事大臣那遜綽克圖隨同畫稿協領音得太筆帖式松蔭稿面書押均有不合著一併交部察議至所請此項捐存磚茶庫倫現無急需應存應提請旨交部辦理等語此項磚茶本非奏明捐辦之項豈得任意苛派所有現存之茶九百十五箱五塊著交那遜綽克圖賞還原捐各商民按照所捐多寡數目分別攤給毋任經手員役從中舞弊倘再查有侵蝕情事卽惟該大臣是問餘著照所

議辦理該部知道○戊寅諭金順奏副都統傷病增劇請開缺回旗可否賞食全俸一摺青州副都統托雲佈著准其開缺回旗並加恩賞食全俸以養餘年○己卯調德克吉訥爲青州副都統以恩普爲鑲紅旗蒙古副都統○庚辰諭鑾儀衛奏直隸欠解地租及應徵本年租銀請飭催迅解一摺直隸藩司欠解鑾儀衛地租銀兩爲數甚鉅現在發放各款需用孔急著李鴻章嚴飭藩司卽將歷年欠解該衙門地租及應徵本年租銀務於年內如數批解以濟要需○諭戶部奏遵議山東巡撫奏被災各州縣接放各賑請酌撥京餉一摺山東被災各州縣現在散放普賑惟時值隆冬窮黎無術謀生望賑彌切加恩著准其截撥來年京餉銀五萬兩於應解地丁項下照數畫撥卽著陳士杰嚴飭印委員核實散放務使實惠均沾毋任吏胥絲毫弊混以恤災黎餘依議○辛巳賞給貝勒載澂夫人貝勒半俸○諭額勒和布等奏特參司員並自行檢舉一摺戶部郎中福誠近染嗜好辦事弊混著卽革職永不敘用以示懲儆該員本年京察保列一等所有原保之戶部堂官著吏部查取職名議處○頒給湖北房縣城南半山石洞關帝廟及城內城隍廟紫仍山黑龍洞龍神祠匾額○賞京師八旗綠步各營官兵一月錢糧閒散宗室覺羅人等兩月錢糧○壬午予雲南思茅廳孝子吳光漢旌表○癸未賞給通州王恕圖煮賑米石○甲申諭臺灣南北地輿表延甚遠以形勢而論臺北各海口尤爲緊要原設臺灣道一員遠駐臺南深慮難

以兼顧且巡撫常川駐紮一切錢穀刑名事宜必須分員管理各專責成應否於臺灣道之外添設臺北道一員著楊昌濬劉銘傳悉心會商妥議具奏○諭前據劉銘傳奏參臺灣道劉璈貪污狡詐劣跡多端當將該員革職拿問並將任所原籍資產一并查抄特派錫珍衛榮光馳往查辦茲據查明覆奏此案劉璈被參鹽務礦務營私舞弊各節經錫珍等傳集人證詳核卷宗雖多辦理不善尙無侵吞虧短通同作弊情事惟於所部各營空額經已革提督高登玉繳入道署銀一萬一千六百餘兩又將夫價銀兩扣存帳房四千五百餘兩據供留作賞需並無詳報案據又於其子劉濟南招募船價浮冒銀一萬兩零該革道以監司大員總理營務輒敢虛支鉅款任意浮銷律以監守自盜罪無可辭已革臺灣道劉璈著照所擬斬監候卽由該督撫派員解交刑部監禁其應繳之款除抄產備抵外餘著勒限追完照例辦理至摺內所奏薛樹華供稱送給洋銀一萬兩張稅是否轉給劉璈伊不知曉及王青雲等所供洋藥釐金每年交給道署規費銀二萬七千另九十兩按年帳轉撥還撥給等語聲敘殊未明晰豈得以事無左證免置勿論著刑部於全案供招解到時再將以上兩款詳細查明具奏已革提督高登玉明知劉璈虛報夫數輒代出印領扣繳多贓實屬朋比爲奸著從重發往軍臺効力贖罪已革同知胡培滋管理支應於劉璈虛報募勇船價等情毫無覺察明知夫餉浮冒又不據實舉發實屬知情徇隱業經革職著永不敘用仍

驅逐回籍不准逗遛副將張福勝在臺年久聲名平常著卽行革職知府劉濟南素行不檢物議滋多著一併革職餘著照所議辦理該部知道○諭軍機大臣等前據卞寶第劉銘傳先後具奏已革臺灣道劉璈任所原籍資產業經遵旨查抄劉璈現經訊明定罪監禁追贓其任所抄出銀兩卽著劉銘傳派員解部原籍抄出資產著卞寶第按照原單核實變價解部備抵○徐致祥奏臣於光緒十年十一日條陳山東河工事宜業經 明鑒迄今又一年矣下游決口未塞上游又復潰決漫溢數百里本年八月欽奉懿旨停止北海工程撥銀賑濟仰見 皇太后 皇上宵旰焦勞無刻不以民生爲念凡有血氣同深銘感然而河患不治今歲如此明歲復然此岸甫堵彼岸又潰沙淤壅積遏之益甚也水勢漫汎障之不能也非併力疏導集欸濟用專員責成得人辦理無以成一勞永逸之計而紓 九重憂顧之憂 臣請更爲 皇太后 皇上力陳之查東省黃河內海舊口積沙百餘里人人皆知特以工大難籌餉絀莫繼因主築堤之說冀其展拓河身讓地於河其勢或可稍殺不知下游淤墊日甚一日勢愈緩則沙愈滯堤加高則河加長俯視則堤內如釜底之形倒灌則河身如建瓴之勢隨塞隨決旋決旋塞每歲帑項數十萬金何異投諸洪流乎且黃河衝決奔放順逆無常倘竟北趨汎入 畿輔伊於河底而前後數十萬災民羸者斃於溝壑強者肆其劫奪加以各省伏莽根株未絕轉相搆煽禍亂滋生 臣所慮者不在外侮而尤在

內患也然則疏導之功要於築堤疏導之費亦十倍於築堤方今 朝廷籌辦海防整飭武備誠發憤爲
雄之善策先事預防之深謀顧防海以禦外侮治河以靖內患均爲 國家當今急務聞海防每歲所需
不下五六百萬兩河工大治計非千萬兩不可然一治之後費即可省不必歲歲鉅款也 朝廷費千萬
之帑金闔閭全百萬之生命臣知 皇太后 皇上必不惜重帑而棄生靈也然必責有攸歸事乃克濟
山東巡撫管理吏治鹽務海防政事殷繁日不暇給卽才倍於陳士杰者亦難兼顧雖嚴予懲處究無補
於絲毫查河東河道總督本兼轄山東汴工頻歲安瀾或責河南巡撫暫行兼管而移河道總督於山東
專督厥事俾責無旁貸然必 特簡一公正廉明幹濟宏遠之重臣寄以總河鉅任隆其倚畀假以便宜
並請先 命其周歷徧視審度地勢訪察輿情毋避怨言毋膠己見東省官紳亦當力顧全局不得各分
畛域致滋聚訟規模既定然後施功則餉不虛糜效可實獲山東濟東泰武臨道兗沂曹濟道運河道職
司河工亦須 簡爲守兼優之員俾資臂助中外臣工如實有通曉河務幹略任事者無論實缺候補
選人員請 旨飭下在京六部九卿在外督撫據實保奏不得以鑽營請託者妄用匪人亦不得以空言
無補者濫登薦牘至因公獲咎之員才堪任用者亦許一律保薦恭候 聖裁但不准自行投効爲實緣
開復之階臣恭繹 列祖 列宗聖訓諄諄以治河爲急至再至三 諭戒臣工輒謂河務最難辦理災

民尤可哀矜而慎簡河臣屢頒帑項兢兢焉不憚爲其難者 祖宗之用心深且遠矣臣智慮短淺罔補時艱愚戇之衷難安緘默可否 飭下各該大臣統籌緩急詳細規畫或交廷臣會議以期集思廣益諸臣中儘有卓識遠猷足備 聖明採擇者伏望 宸斷折衷施行則天下幸甚 臣等幸甚不獨東省瘡痍沐更生之慶也 上諭太常寺少卿徐致祥奏山東河患日深請卽籌興修一摺據稱東省河工頻歲潰決亟宜併力疏導集欸濟用並請移河道總督於山東周歷審度以專責成等語著該部妥議具奏所請飭保通曉河務人員以期集思廣益不爲無見著京外各大員據實保舉用備器使○諭御史金壽松奏吏部選章未能悉協請飭酌量變通一摺著吏部議奏○諭太常寺少卿徐致祥奏順天鄉試貢院號舍請准增添等語順天鄉試應考人數衆多號舍不敷著加恩酌予添建以遂多士觀光之願卽由順天府會同各該部查勘奏明辦理○命福州將軍穆圖善爲欽差大臣會同東三省將軍辦理練兵事宜各城副都統以下均歸節制○前任兩江總督李宗義卒予祭葬政績付國史館列傳○乙酉 上詣 時應宮拈香○丁亥欽奉 慈禧端佑康頤昭豫莊誠皇太后懿旨前據軍機大臣總理各國事務衙門會同神機營王大臣遵議東三省邊防事宜屯田如果辦理得宜爲天地自然之利各該將軍身任地方均屬分內應爲之事並著確切商辦原摺片均著鈔給閱看○戊子 上詣 南海自在觀拈香○湖北巡撫

彭祖賢卒予祭葬○己丑以譚鈞培爲湖北巡撫王嵩齡爲江蘇布政使○以瑞璋爲江西按察使○壬辰以奕霽爲興京副都統○癸巳楊岳斌奏臣於光緒十一年七月二十三日在泉州行次謹將找發各營餉項解繳軍裝辦理報銷大概情形繕摺奏明在案臣與營務處刑部主事楊秀實副將石朝珩在廈督飭各營附輪赴漢探得水師提督臣彭楚漢興泉永道奎俊廣東候補道秦文瀾極力照料始克迅速竣事初十日馳抵福州算結餉項臣前領湖南湖北江西三省協餉共銀十八萬三千兩又前大學士臣左宗棠銀八百兩兩江督臣曾國荃銀一千兩除提購鎗礮彈子火藥銅帽製辦軍裝等件以及開銷運費其餘銀兩自上年八月募勇起支發文武員弁薪水九月十九日起支發衛隊新兵三哨官弁勇夫口糧十月二十一起支發乾軍分統營務處及十三營官弁勇夫薪水口糧一律截至本年正月二十日止歸臣彙造報銷其自本年正月二十一起至七月八月止所有月需餉銀臣在閩省領放若干業與省會善後總局逐一算清結楚應歸閩省報銷至於軍裝一項據軍械所委員湖北候補同知劉度來稟稱直隸督臣李鴻章兩廣督臣張之洞協濟毛瑟鎗一千枝子五十萬粒前船政大臣張佩綸協濟小克虜伯礮十八尊藥彈車輪六百五十三箱兵部尙書臣彭玉麟協濟來復鎗七百枝銅帽五十萬顆分儲臺北軍械所廈門水師提督軍裝局均未動用前領兩江督臣曾國荃林明敦鎗三千枝子七十萬粒

意快鎗二十枝子一萬粒洋藥三百九十八桶銅帽四十萬顆鉛子三千斤湖北撫臣彭祖賢來復鎗二百枝土藥二百桶銅帽四萬九千顆又長江水師提臣李成謀湖南提臣李勝候補直隸州知州錢詔文及臣自購共來復鎗七百五十八枝前署安徽撫臣盧士杰協濟火藥一百桶銅帽二十萬顆鉛子二千斤閩浙督臣楊昌濬協濟來復鎗二百枝洋藥二十八桶銅帽二萬顆福建撫臣劉銘傳協濟云者士鎗三百枝又撥用泉州府知府徐震耀銅帽十萬顆統計林明敦鎗來復鎗云者士鎗四千四百五十八枝七月二十日交水師提臣彭楚漢黎意快鎗云者士等鎗四十六枝子一萬三千粒作爲操防之用其餘發給各營操演除炸壞遺失外實存四千一百枝又操演打靶用去林明敦鎗子不計粒火藥不計桶銅帽不計顆實存林明敦鎗子五十九萬四千三百粒火藥三百六十六桶銅帽四十四萬九千五百顆以及前製大刀牌刀鎗矛長矛籐牌藍布單夾帳棚並架金鑼銅鈴皮鼓噴吶銅號旗幟號衣鏟鍬斧頭鐵鑊柴刀鋤頭馬蹄礮等件除損壞外其餘並前項軍械火藥概行咨明分繳臺北軍械所廈門水師提督軍裝局泉州府庫江西河口四處存儲備用前撤營勇經兩江督臣曾國荃會商長江水師提臣李成謀飭派南洋兵輪及由廈加雇商輪分起裝載赴漢昨接湖廣督臣裕祿電稱八月初旬陸續到鄂尙屬安靜當由裕祿與撫臣彭祖賢等俯念勞苦商同水師漢陽鎮總兵高光效派船照料並飭善後局按名給

船錢五百文資遣分途回里伏思

臣此次領軍實賴各省督撫臣思盡一心不分畛域馳撥軍械協助餉

需藉壯聲威俾無顧慮

臣渡臺日經前大學士臣左宗棠將軍臣穆圖善督臣楊昌濬撫臣劉銘傳等預

籌經費得資迅渡聞

臣撤營後籌備餉銀先行解厦改能剋期遣撤不致延久虛糜臣在閩省現無經手

未完事件仰蒙

俞允撤營事竣回籍養親感激涕零擬於八月二十八日起程附乘登瀛輪船由海道

回籍終養衰齡病母永戴

聖慈報聞○頒給運河韓莊閘

大王廟

湖神廟匾額○甲午諭莊親王

載勛自本年正月以來迭次請假爲日過多殊屬不合著交宗人府議處嗣後王大臣等務當勤奮供職

不得無故託疾乞假以重職守○諭領侍衛內大臣統轄三旗侍衛有稽察之責近來該大臣等於值班

之期往往藉詞不到以致侍衛贖班無從稽查殊非慎重門禁之意嗣後該大臣等務當認真查察如有

侍衛贖誤卽行嚴參該大臣等亦不准無故藉詞推班以重職守○諭本年山東沿河隄埝屢次復決小

民顛沛流離情殊可憫迭經諭令該撫妥籌賑撫並特發內帑銀五萬兩以資接濟現在天氣嚴寒被水

災區未經涸復者尙多各災民棲身無所餬口無資一切困苦情形倍堪軫念欽奉 慈禧端佑康頤昭

豫莊誠皇太后懿旨著戶部於本年節應進宮內銀欸撥銀五萬兩發交陳士杰核實散放欽此該撫當

仰體

聖慈軫念民艱之意遴派妥員確查被災處所分別散放總期實惠均沾不得稍有弊混一面將

應辦冬賑事宜督飭各屬寬爲撫恤並將現辦情形隨時奏聞務使民困稍蘇用紓 慈系

十一月乙未朔劉錦棠奏查新疆著名荒瘠自經兵燹凋劫尤甚整頓撫綏悉關緊要而漢回雜處語言文字隔閼不通非習知其情無從求治故從前各項差委皆以隨營辦事人員擇能而任現值設省之始亦應酌立定章新疆北路實缺人員向由關內調補以後甘肅人員應准於新疆酌量委用擬請凡甘肅候補曾經引見驗看領照到省以及實缺人員如熟悉邊務調赴新疆差遣偶有人地相宜缺出准予分別請補請調毋庸先行奏留若留甘尚未引見驗看先經隨營當差擬卽查取履歷分咨部籍無論正雜亦擇人地相宜之缺准其酌補其現在隨營人員內有分省補選並他省候補各員從事有年於邊務亦多熟悉擬請照依變通章程分別奏咨無論曾否委署地方均准留於甘肅新疆照章補署若向未_臣在營當差仍不得概援此章以示限制至請補各項員缺除南路經_臣奏准仿照吉林章程由外揀補一次外北路添改各缺事同一律亦應先行由外揀補一次之後與北路舊有各缺一體援照雲貴甘肅變通章程請補統俟地方事務大定再照向例辦理以歸畫一惟新疆各缺例准俸滿調升內地原以鼓勵人才於邊缺特示優異現在新設各廳州縣有距甘省在七八千里以外者各該員捧檄馳驅不辭勞瘁若僅恃此二十餘屬以爲升調竊恐鼓勵之道有時而窮且此二十餘屬又多瘠苦尤不足以廣激勸查

新疆北路各缺例限三年五年分別俸滿南路程途更遠應請比照辦事文員三年期滿例均作為三年俸滿屆期由藩司察其在任實心任事出具考語詳由撫臣驗看咨送甘省照例升用再實缺人員例准保送卓異甘肅州縣以上定例六員教佐二員烏魯木齊都統所屬同通雜職果有實係出色亦准保薦一員每屆計典新疆向由甘省辦理茲既改置行省增設郡縣可否從寬酌定額數分別核辦應請飭部併議示覆以便將來擇尤保薦如不得其人任缺毋濫倘有庸劣不職仍隨時查明參劾如此分別定章庶於變通之中仍寓慎重之意下部議奏○戊戌張曜奏臣於本年六月初一日准工部咨五月二十九日內閣奉 上諭京師內外城護城河自道光十三年興修以後迄今五十餘年未經挑挖河身日淤河面日窄每逢大雨水無所歸自應及時修濬以資宣洩著派張曜督率所部步隊十營及馮南斌二營查照該部所擬辦法將積淤挑除淨盡俾河道一律深通其有未盡事宜及臨時必須變通之處統由該營隨時隨地相度情形咨商該部辦理所有派出勇丁卽著張曜督飭各該管營官嚴加約束等因欽此欽遵鈔錄原奏咨行到臣遵將欽天監擇定七月初七日卯時西南坤方動土興工日期具摺奏明在案馮南斌甘軍兩營蔣東才精銳四營先後到工並由神機營造撥鐵鉞鐵鉞運土小車荆筐招色木極木椿各項器具到營經臣督率統領甘軍記名提督甯夏鎮總兵馮南斌統領豫軍精銳營記名提督蔣東

才嵩武軍分統記名提督孫金彪王連三劉世俊並各營官周歷勘分段落照工部查定丈尺按十六營
勻分通力合作並由神機營添派員弁會同在營文武監視督催往來城鄉梭巡稽查步軍統領衙門所
派弁兵分段駐紮巡查市廛無擾軍民相安前蒙 恩賞勇丁銀兩祇領之下益形踴躍茲於十月二十
八日全工告竣所有內外護城河一律深通挖出河淤培補兩岸窄處幫寬低處增高加土夯築沙土鬆
浮之處間用木椿排釘大小浪窩逐一墊平沿河民房民田均與河流無礙照依工部咨文概未拆動以
省紛擾綜計工部查定丈尺共一萬四千餘丈內除釣魚臺及青龍橋二段湊長一千一百八十餘丈與
河道無關不須挑濬又朝陽門至東便門護城河一段長六百十八丈六尺此段工程向由倉場衙門於
運糧事竣啟開將水放乾次年春融挑濬現在該處糧運雖完河底已凍趕做不及自應仍由倉場衙門
照章辦理城河裏岸舊有磚砌水簸箕雨後流水入河以免衝刷泊岸現在僅存七處其餘年久悉數坍
塌現留水簸箕缺口一百十五處以備將來用磚修砌深恐春雨衝刷損壞由神機營購發石灰和土捶
築惟營勇於此項工程未曾熟習用灰過多僅做內城南面十七處至城河泊岸沙多土少必須預定歲
修章程方期經久所有內外城河工程一律完竣日期謹繪圖貼說恭呈 御覽 上諭前因京師護城
河淤墊特命張曜督率勇營興工挑挖茲據張曜奏修濬內外城河工程一律完竣並繪圖呈覽此項工

程經張曜督率各營弁勇奮勉興修頗能嚴明約束尅日竣工辦理甚爲妥速廣西巡撫張曜著交部從優議敘張曜之子工部主事張端本加恩著賞給郎中歸本部候補寶夏鎮總兵馮南斌記名提督蔣東才孫金彪王連三劉世俊均著交部議敘並加恩各賞給大緞二匹以獎勞勩其餘出力員弁准由張曜擇尤酌保餘依議該部知道欽奉 慈禧端佑康頤昭豫莊誠皇太后懿旨此次出力員弁加恩著賞給銀一萬兩由神機營發給○慶裕等奏奴才等當大雨時行之先遵例會派委員興京防禦景榮委官春麟候補同知達崇阿等前赴 永陵守護泊岸倘有衝刷卽行呈報去後嗣據該員與地方官等報稱六月十七日至二十五六連日大雨山水漲發河水泛溢兩岸平地水深數尺將 永陵明堂前草倉河泊岸由辰巳方兩空間衝刷西岸長四丈五尺寬四五尺深三四尺不等椿笆向有欹陷板橋迤西巳方南岸衝刷長二十一丈寬深均四五尺不等其內北岸衝倒柳樹一顆橫欹河面壅滯水勢致將椿笆衝落大半又巳午方北岸衝刷長二十八丈寬深均四五尺不等午未方被水衝刷接連塌陷南岸計長三十丈寬三四尺深二三尺不等北岸柳樹衝倒一顆橫阻水勢衝開決口兩段東段長三丈寬八九尺深四五尺西段長六尺寬八九尺深四五尺不等椿笆均各無存並衝申方南岸間有塌陷計長十丈寬四五尺深二三尺不等又因河水漫溢並由街道湧出之水匯流西下致將中間車道衝刷東西湊長一百